

**Jawatankuasa Khas: Pendengaran Awam Dalam Tempoh 3 Bulan**  
**mStar Online**  
**Oktober 12, 2011**  
**Oleh ARIFFUDDIN ISHAK**

**KUALA LUMPUR:** Pendengaran awam oleh Jawatankuasa Pilihan Khas Parlimen bagi mengumpul maklum balas serta cadangan berhubung penambahbaikan sistem pilihan raya akan diadakan dalam tempoh tiga bulan bermula November ini hingga Januari tahun depan.

Pengerusinya, Datuk Seri Dr Maximus Ongkili berkata, jawatankuasa berkenaan akan menemui wakil-wakil pertubuhan bukan kerajaan (NGO) yang berdaftar serta individu dalam masyarakat bermula 11 November ini.

Proses pendengaran awam tersebut akan diadakan di enam lokasi di seluruh negara dengan dua sesi pada setiap tempat.

Sesi pertama diadakan pada 11 dan 12 November bermula pukul 9.30 pagi di Bilik Jawatankuasa 2, bangunan Parlimen diikuti pada 25 dan 26 November di Bilik Kedah, Kompleks Pentadbiran Persekutuan Sabah di Kota Kinabalu.

Sementara itu pada 8 dan 9 Disember pendengaran awam akan diadakan di Bilik Gerakan Negeri, Wisma Bapa Malaysia, Kuching, Sarawak manakala pada 15 dan 16 Disember proses tersebut akan diadakan di Dewan Sri Pinang, Pulau Pinang.

Bagi wilayah Pantai Timur akan diadakan di Bilik Gerakan Negeri, Kota Baru, Kelantan pada 7 dan 8 Januari manakala di kawasan selatan ia akan diadakan pada 12 dan 13 Januari di Bilik Gerakan Tun Razak, Bangunan Sultan Ibrahim, Johor.

Keputusan berkenaan diputuskan dalam mesyuarat pertama jawatankuasa berkenaan yang dianggotai sembilan wakil rakyat daripada Barisan Nasional (BN), pembangkang dan bebas di bangunan Parlimen pada Rabu.

Hakcipta Terpelihara © 1995-2011 Star Publications (Malaysia) Bhd

Source:

[http://mstar.com.my/berita/cerita.asp?file=/2011/10/12/mstar\\_berita/20111012153356&sec=mstar\\_berita](http://mstar.com.my/berita/cerita.asp?file=/2011/10/12/mstar_berita/20111012153356&sec=mstar_berita)